

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TUAN LIM LIP ENG
(SEGAMBUT)**

PERTANYAAN : LISAN

TARIKH : 08.10.2014

Y.B. TUAN LIM LIP ENG [SEGAMBUT] minta **MENTERI KEWANGAN** menyatakan tujuan Kerajaan menubuhkan 1Malaysia Development Berhad (1MDB), kaedah diguna untuk mengumpul dana, jumlah dana terkini, apakah pencapaian-pencapaiannya dan apakah perbezaan peranan di antara 1MDB dengan Khazanah Nasional dan Permodalan Nasional Berhad.

JAWAPAN

Tuan Yang Dipertua,

Tujuan Kerajaan menubuhkan 1Malaysia Development Berhad (“1MDB”) pada tahun 2009 di bawah Akta Syarikat 1965 adalah bagi menerajui inisiatif-inisiatif strategik pembangunan ekonomi jangka panjang yang mampan dan menggalakkan pengaliran masuk pelaburan asing ke dalam Negara. Fungsi utama 1MDB merangkumi:

- i. Melabur dalam projek-projek yang boleh membantu memacu inisiatif strategik untuk pembangunan mampan jangka panjang dan menggalakkan aliran masuk pelaburan langsung asing; dan
- ii. Menggunakan rangkaian antarabangsa (*international networking*) bagi membawa masuk pelaburan langsung asing yang berpadanan untuk projek-projek Negara.

Kaedah yang digunakan oleh 1MDB untuk mengumpul dana adalah dengan membawa masuk pelaburan langsung asing yang berpadanan untuk projek-projek Negara dan menerbitkan bon.

Pihak yang memberi pinjaman kepada 1MDB terdiri daripada institusi kewangan domestik dan antarabangsa. 1MDB mempunyai pinjaman sebanyak RM5.8 bilion yang menerima jaminan eksplisit Kerajaan Malaysia. Selain daripada itu, 1MDB tidak menerima jaminan dari Kerajaan bagi bon-bon atau pinjaman-pinjaman yang lain. RM5 billion adalah jaminan yang diberi kepada bon-bon IMTN 30 tahun yang diterbitkan oleh 1MDB dan RM800juta bagi pinjaman 1MDB.

Jumlah nilai aset terkumpul 1MDB pada tahun berakhir 31 Mac 2013 pula adalah sebanyak RM44.66 bilion.

Tuan Yang Dipertua,

Untuk makluman dewan yang mulia ini,

1MDB menerajui projek jangka panjang untuk mengambil peluang ke atas pelaburan dan kepakaran antarabangsa bagi melabur dalam projek yang mempunyai nilai pengganda yang tinggi dan berinovasi. Di antara pelaburan yang kini sedang dijalankan adalah seperti yang berikut:

1. Tun Razak Exchange:

Direka bentuk bagi memenuhi keperluan masa depan, pembangunan Pusat Kewangan Antarabangsa Tun Razak Exchange, contohnya dikenalpasti oleh Kerajaan Malaysia sebagai *Early Entry Point* dalam Program Transformasi Ekonomi untuk mencapai lebih dua kali ganda pendapatan perkapita menjelang 2020.

Projek yang dianggarkan bernilai RM26 billion dan mempunyai jangka masa pembinaan selama 15 tahun ini mempunyai visi untuk membangunkan Kuala Lumpur sebagai hub kewangan antarabangsa selaras dengan hasrat Kerajaan untuk menjadikan ia sebuah bandaraya global.

Baru-baru ini TRX juga telah memilih syarikat hartanah dan infrastruktur antarabangsa Lend Lease sebagai rakan kongsi utama di dalam projek pembangunannya untuk TRX ‘Lifestyle Quarter’. Perjanjian yang ditandatangani 1MDB Real Estate Sdn Bhd (1MDB RE) dan Lend

Lease ini dijangka menarik sehingga US\$1 bilion (RM3.2 bilion) dalam bentuk pelaburan langsung asing ke Malaysia.

2. Pembangunan Semula Pangkalan Udara Kuala Lumpur kepada Bandar Malaysia:

Bandar Malaysia pula adalah satu projek pembangunan bersepadu memajukan semula tanah Lapangan Terbang Sungai Besi yang akan menjadi ikon kepada kelestarian kehidupan di bandar Kuala Lumpur. Projek ini turut memperuntukkan sebahagian daripada keluasannya untuk membina Projek Perumahan Mampu Milik khusus kepada kumpulan eksekutif muda yang bekerja di kawasan bandar.

3. Sektor Tenaga:

Sektor tenaga juga adalah salah satu sektor fokus 1MDB pada masa ini. Pembelian aset-aset tenaga Tanjong Energy Holdings, Genting Sanyen dan juga Jimah Energy Ventures Sdn Bhd baru-baru ini merupakan langkah bagi 1MDB ke arah memenuhi aspirasi Kerajaan untuk membina jaminan

tenaga mampan dalam jangka panjang.

Konsortium 1MDB-Mitsui juga telah memenangi Projek 3B oleh Suruhanjaya Tenaga yang akan melibatkan pembinaan dan operasi 2000MW loji arang batu bersebelahan loji janakuasa Jimah di Negeri Sembilan.

1MDB kini merupakan pengeluar tenaga bebas (IPP) kedua terbesar
di Malaysia dari segi kapasiti pengeluaran tenaga.

Tuan Yang Dipertua,

1MDB ditubuhkan untuk memacu pembangunan ekonomi mampan
jangka masa panjang yang berimpak tinggi bagi Malaysia dan untuk
menjalin perkongsian strategik global dalam menarik pelaburan langsung
asing ke Malaysia yang memberi fokus utama kepada sektor tenaga,
hartanah dan hospitaliti.

1MDB memainkan peranan penting sebagai pemboleh yang diamanahkan oleh Kerajaan Malaysia untuk menjadi pemangkin dalam memacu prinsip-prinsip 1 Malaysia dan Model Ekonomi Baru.